




ԵԿԵՂԵՑԱԿԱՆ ԲԵՄ. ԼՈՒՐԵՐ

**Հունվարի 1-ին, կիրակի.—Կաղանդ, Տա-
րեմուտ:**

Այսօր Մայր տաճարում, Ավագ խորանի վրա, ս. պատարագ է մատուցում հյուրաբար Մայր Աթոռում գտնվող Տ. Աբել աբեղա Օղ-լուգյանը:

Արձակման Ավետարանի ընթերցումից հե-տո, Իջման ս. սեղանից քարոզ է խոսում Տ. Թորգոմ յաբեղա խարապյանը՝ «Խաղաղու-թյուն ամենեցուն» բնաբանով:

Հայր սուրբն իր քարոզի ընթացքում անդ-րադառնում է խաղաղության կարևորությա-նը՝ ի մտի ունենալով արդի քաղաքական լարված իրավիճակը: Նա շեշտում է, որ երկ-րագնդում խաղաղության կայունությունը մեծ նշանակություն ունի մանավանդ հայ ժողո-վըրդի համար՝ հիշեցնելով հայ ժողովրդի քսաներորդ դարասկզբի դառը ճակատագի-րը: Եվ վերջում քարոզիչ հայր սուրբը մաղ-թում է. «Խաղաղություն ամենքին, խաղա-ղություն ամենուր, խաղաղություն ամեն ժամ»:

Հավարտ ս. պատարագի Վեհափառ Հայ-րապետի նախագահությամբ կատարվում է Հայրապետական մաղթանք:

*
*
*

**Հունվարի 7-ին, երկուշաբթի.—Յիշատակ
մեռելոց:**

Այսօր Մայր տաճարում, Ավագ խորանի վրա, ս. պատարագ է մատուցում Տ. Գրի-գոր քին. Տերտերյանը:

Հավարտ ս. պատարագի կատարվում է հոգեհանգիստ՝ «վասն համօրէն ննջեցելոց»:

*
*
*

**Հունվարի 9-ին, չորեքշաբթի.—Այսօր Վե-
հարանի ընդունելությունների դահլիճում տե-
ղի ունեցավ միաբանական առաջին հավա-
քույթը: Հավաքույթն սկսվեց Տերունական
աղոթքով:**

Հետաքրքիր և բովանդակալից պեկուցու-մով հանդես եկավ Տ. Հուսիկ քին. Լավար-յանը, որն ունկնդիրներին ներկայացրեց «Հովհաննես Թումանյանի կրոնական թեմա-ներով գրված բանաստեղծությունները»:

Տեր հայրը, վեր հանելով Հ. Թումանյանի գրական ժառանգության հատկանիշներն ու գեղարվեստական մեթոդները, իր խոսքը մասնավորեց կրոնական թեմաներով գրված բանաստեղծությունների մասին, որտեղ ի հայտ են գալիս նրա պոետիկությունն ու սերը դեպի եկեղեցին: Տեր հայրը նշում է նաև, որ Հ. Թումանյանը շատ լավ ծանոթ է եղել Աստվածաշնչին, որովհետև ծնվել և մեծացել է քահանայի ընտանիքում: Այդ բանաստեղ-ծությունները տեր հայրը բաժանեց երկու մասի. ա. Հին կտակարանի թեմաներով, և բ. Նոր կտակարանի թեմաներով գրված բա-նաստեղծություններ: Տեր հայրը համառո-տակի անդրադարձավ նաև այդ բանաստեղ-ծությունների գրական և գեղարվեստական արժանիքներին:

Վերջում տեղի ունեցավ կարծիքների աշխույժ փոխանակություն:

*
* *

Հունվարի 10-ին, հինգշաբթի.—Այսօր, Հայ Եկեղեցին մոտիկից ճանաչելու համար, Մայր Աթոռ Ս. Էջմիածին են ժամանում Լեւինգրադի հոգևոր ակադեմիայի ասպիրանտներ Տ. Ավգուստին վրդ. Ջորավկովը (Բուդապեշտի Պրավոսլավ Եկեղեցի), Տեր Բիրց քին. Մեպիմիրը և Կիրկոս սրկ. Կինետեբերը (Եթովպական Եկեղեցի)՝ առաջնորդությամբ Լեւինգրադի հոգևոր ակադեմիայի դասախոս Տ. Ինոկենտի աբեղա Պավլովի (Ռուս Պրավոսլավ Եկեղեցի):

Հյուրերին «Չվարթնոց» օդանավակայանում դիմավորում և բարի գալուստ են մաղթում Մայր Աթոռի միաբաններ Ստեփան և Գուրգեն սարկավագները:

Հաջորդ օրը Վեհափառ Հայրապետը ընդունում է հյուրերին և տալիս նրանց իր օրհնություններն ու մաղթանքները:

Քույր Եկեղեցիների ուխտավորները հունվարի 10—15-ը լինում են պատմական Վաղարշապատի վանքերում, այցելում Հայաստանի պատմամշակութային հուշարձաններ, լինում Ս. Մեսրոպ Մաշտոցի անվան Մատենադարանում և Ծիծեռնակաբերդում՝ իրենց հարգանքը մատուցում Մեծ եղեռնի զոհերի հիշատակին:

*
* *

Նույն օրը Մայր Աթոռ է ժամանում Ռուսոլվայի հայ համայնքի առաջնորդական տեղապահ հոգեւորիկ Տ. Հակոբ վրդ. Գըլընձյանը:

*
* *

Հունվարի 13-ին, կիրակի.—Տօն անուանակոչութեան Տեառն մերոյ Յիսուսի Քրիստոսի:

Այսօր Մայր տաճարում, Ավագ ս. սեղանի վրա, ս. պատարագ է մատուցում Տ. Ասողիկ աբեղա Արիստակեսյանը:

«Հայր մեր»-ից առաջ քարոզ է խոսում «Եւ կոչեաց անուն նորա Յիսուս» բնաբանով:

Խոսելով Անվանակոչության մասին, պատարագից հայր սուրբը վեր է հանում մեր Տիրոջ երկրային կյանքի փրկագործական կարևոր դերը: Նա շեշտում է, որ փրկագործությունը կազմում է քրիստոնեության հիմնական գաղափարը: Երկնառաք Փրկիչը երկրի վրա հանդես եկավ որպես Փրկիչ և

որպես օծյալ «թագավոր»՝ թագավոր՝ նոր աշխարհի և իշխան՝ նոր խաղաղության:

Ս. պատարագին ներկա էին նաև լեւինգրադցի հյուրերը:

*
* *

Հունվարի 14-ին, երկուշաբթի.—Տօն Սընդեան Ս. Յովհաննու Կարապետին:

Այսօր Մայր Աթոռի մկրտարանի Ս. Հովհաննես Մկրտչի անունը կրող մատուռի ս. սեղանին ս. պատարագ է մատուցում մկրտարանի տեսուչ Տ. Արտակ քին. Սիմոնյանը:

*
* *

Հունվարի 15-ին, երեքշաբթի.—Այսօր, Ս. Էջմիածնի պատմական հուշարձաններին ծանոթանալու համար, Մայր Աթոռ այցելեց հյուրաբար Հայաստանում գտնվող Արտասահմանյան հայրենակիցների հետ մշակութային կապի «Ռոդինա» ընկերության նախագահության նախագահ պրն. Ա. Պ. Շիտիկովը՝ Սփյուռքահայության հետ մշակութային կապի կոմիտեի նախագահ պրն. Վ. Համապասայանի ուղեկցությամբ:

Հյուրերին Վեհարանում ընդունեց Վեհափառ Հայրապետը:

Հանդիպումն անցավ բարեկամական մթնոլորտում:

Այա հյուրերն այցելեցին «Ալեք և Մարի Մանուկյան գանձատուն»:

*
* *

Հունվարի 16-ին, չորեքշաբթի.—Այսօր Վեհարանի ընդունելությունների դահլիճում տեղի է ունենում միաբանական հերթական հավաքույթ:

Հավաքույթի սկզբում քննարկվում է Տ. Ասողիկ աբեղա Արիստակեսյանի հունվարի 13-ին Մայր տաճարում խոսած քարոզը:

Այնուհետև Մայր Աթոռի դիվանապետ Տ. Ներսես եպս. Պոպայալյանը ունկնդիրներին է ներկայացնում 1984 թ. դեկտեմբերի 10-ին Չեխոսլովակիայի Կարլովի Վարի քաղաքում կայացած Արևմյան և Արևելյան քրիստոնեական Եկեղեցիների ներկայացուցիչների վեցերորդ ժողովը (տես էջ 37):

Այնուհետև հավաքույթի ներկաներին իր համայնքի կրոնական և ազգային կյանքն է ներկայացնում ուխտավորաբար Մայր Աթոռում գտնվող Ռուսոլվայի հայ համայնքի առաջնորդական տեղապահ Տ. Հակոբ վրդ. Գըլընձյանը:

